

Skirbi pa Gregorio Wolff

Rapport IMF di 13 februari 2015

Pa inicia cu comentario ariba e informacion aki ta bon pa menciona 2 asunto. Di prome e informacion aki ta preliminar y ta e punto di bista di e funcionarionan di IMF, kendenan a bishita Aruba algun tempo atras.

Di dos, IMF semper ta duna su puntonan di bista na favor di e ideologia reinante, esta e Neo-Liberalismo, cual no ta carga e pensamiento di e clase Trahadado, ni di sindicalismo serio.

E rapport ta cuminsa bisa cu e economia di Aruba ta recuperando y no por bisa cuanto e economia a crece, ta bisa cu esaki lo ta menos cu durante 2013, a pesar cu turismo a crece mas cu 2013.

Nan expectativa pa 2015 ta banda di 2¼%, maske tin incertidumbre pa motibo di cierto subsidionan y e famoso proyectonan di PPP.

E riesgo grandi pa Aruba ta, e unico pilar economico cu ta turismo y di cual e 2 paisnan cu ta trece mas turismo pa Aruba por bira menos.

Venezuela tin un situacion nacional insegur. Pa Merca, riesgo ta e posibel habrimiento di frontera na Cuba pa turismo Mericano.

E rapport ta elogia e hisamento di edad di pensioen general pa 65 aña, e cambionan den e areglo di pensioen di trahadonan di Gobierno y e hisamento di BBO cu 1%, pa gobierno baha

su Contribucion di Pais na AZV.

E rapport ta menciona cu debenan nacional a surpasa e 80% di nos GDP, na 2014.

Ta conoci cu esaki tabata banda di 40% na final di 2009.

Pues e maneho di gobierno fatal y desastroso di 2010 pa 2014 ta motibo di e preocupacionnan di pueblo di Aruba, di Hulanda, di CFT, di IMF, pero menos di nos gobernantenan y nan fanaticada.

E rapport no ta menciona e pakico cu nos debenan a subi asina tanto, pero nan ta purba di conseha pa ainda salba loke por salba y trece Aruba bek, unda e mester ta.

Tocante e pensamiento di Gobierno pa nos presupuesto tin un surplus na 2018 y despues nos presupuesto ta mantene un surplus pa baha e debe externo, IMF no ta kere aden sin tuma medidanan extra pa baha gasto y otro medidanan pa hisa entrada. Nan ta skirbi cu pa futuro AZV mester bira ta financia su mes, traduci esaki kiermen cu Gobierno ta elimina e resto di su Contribucion di Pais na AZV, pues ta subi BBO atrobe cu 1 of 2 % pa AZV.

Manera mi a splica na inicio, IMF, semper tabata y ta keda anti trahado.

Nan ta propone medidanan pa baha entradanan cu ta relaciona cu e salario di e trahado, baha gastonan pa empresarionan, esta

kita derechonan di trahadonan.

Nan ta papia cu maske cu haci e mercado laboral flexibel, nan ta mira e necesidad pa importa trahadonan emigrante.

Pues e clase trahado no tin mucho di spera for di rapportnan di IMF.

Cuanto hende nos kier pa biba na Aruba.

E punto aki cu Aruba mester di mas trahado emigrante, cada biaha IMF ta trece den su informacionnan, pero di nos politiconan y gobernantenan nada. Hopi lidernan empresarial y sindical no ta papia di e problema grandi aki.

Pero si nos pensa un rato bon e ta un problema grandi di Aruba na e momento aki.

Constantemente e cantidad di hende cu ta bini Aruba di afo pa establece nan mes aki ta subi. Hopi hende na e momento aki ta puntra nan mes unda nos ta bay cu e emigracion.

Mi no ta haci mencion di e Arubiano, E merece di ta akinan.

Tur Arubiano di buena fe y tur stranhero cu ta biba na Aruba mester puntra nan mes:

Kico ta e capacidad di carga pa Aruba? Esta cuanto hende nos kier pa biba na Aruba.

E trahado stranhero legal na Aruba grandemente a yuda den e crecemento economico na Aruba, durante mas cu 26 aña,

nan pais ta Aruba, igual na e otro Arubianonan, tur mester por comprende cu no por sigui cu e politica di emigracion actual.

Aruba a drenta Status Aparte cu un superficie di 180 kilometro cuadra y cu un poblacion di banda di 60 mil habitante, awe ya nos a yegando e dobel na habitante y e superficie ta keda igual.

Si wak kico ta pasando cu nos politiconan, tanto di gobierno anterior como esunnan actual, durante cu nan ta den gobernacion, ora placa ta lora bao mesa, nan kier sigui construi mas y mas hotel, anto ora nan ta den oposicion, e mesun hendenan aki ta papia di moratorio, pa no construi mas hotel, pasobra nan tur sa tambe cu construccion di mas hotel ta nifica: mas importacion di Trahadonan stranhero, mas produccion di awa y coriente, mas casnan pa biba, mas scol, mas carretera, mas auto, mas inseguridad, mas desorden y asina mas y mas y mas.

E consecucionan negativo ta:

- menos prosperidad,
- menos naturalesa,,
- menos cultura propio,
- menos hopi cos, cu ta faborece e ser Arubiano y e stranhero cu ta biba aki na Aruba.

Na Palm Beach mayoria di e palmanan a disparce y por bisa cu Palm Beach a bira Beton Beach.

Indirectamente nos medio ambiente lo sigui ricibi sla grandi cu e necesidad di mas Hotel y loke mi a menciona prome den e mas nan.

E Arubianonan lo bira un minoria ariba su propio isla

Tin e relacion di e ser humano

cu naturalesa, nos medio ambiente.

Si nos perde e control y derecho legitimo pa tin den nos man teritorio nacional, nos lo keda subordinado na e centronan di poder trans nacional y nos lo perde e capacidad pa produci rikesa pa garantiza un desaroyo social.

Si nos no sigui mehora nos medio ambiente nos lo perde e capacidad di tin den nos man nos historia y pa crea un futuro sigur.

Pero si nos no kier hiba e discusion ariba cuanto hende nos kier pa biba na Aruba, nos mes ta acepta e politica di emigracion negativo pa Aruba y nos mes ta pusha Aruba pa bira un sorto di Hong Kong, yen di hotel, unda gran parti di pueblo ta biba den flat.

E ora ey y nos por sigui bati riba nos pecho cu nos ta Arubiano, pero tur e ingrediente di e ser Arubiano a bay perdi. Pueblo mester dicidi, politica mester acepta y ehecuta bos di pueblo.

Nos no mester sigui inverti pa loco, mas grandi, mas hopi, pero inverti di forma responsabel, mas miho y duradero manteniendo nos naturalesa, nos cultura, nos identidad.

No inversionnan pa trabaonan di salario minimo y cu ganashi barbaro pa inversionista.

Mas tristo ta cu continuacion di e politica di emigracion actual, pronto ta yega e dia cu Arubianonan ta bira un minoria ariba Aruba.

E discusion ariba e capacidad di carga pa Aruba mester ta ariba mesa, esta cuanto hende nos kier pa biba na Aruba. Ta bon pa Politiconan duna nan opinion ariba e topico aki. □